

13. maj 2014

UPA 2014/76
Ruth Heilmann

**Ulloq 1. januar 2015 aallarnerfigalugu ukiuni tulliuuttuni sisamani KNRmut aningaasaliissutit qaffannissaannut Naalakkersuisut peqquneqarnissaannik Inatsisartut aalajangiiffigisassaattut siunnersuut. Aningaasaliissutit ilassutaat tusagasortut immikkut qaqilerilluni radiomi, tvmi qarasaasiamilu nutaarsiassalerinermut taamaallaat atorpeqassapput
(Inatsisartunut ilaasortaq Andreas Uldum, Demokraatit)**

Siumup tungaaniit tusagassiuuteqarneq pingaartitaraarput inuiannut kalaallit nunaanni isorartuumi nunaqarfippassuaqartumilu najugaqartunut pinngitsoorneqarsinnaanngim-mat, aammalu kulturikkut anersaakkut qanorlu inooriaaseqarnitsinnut nunarsuarmioqataasutullu inuunitsinnut tusagassiinermi siammarterisuummat tassaalluni ulloq unnuarlu tamaat immersuisuullunilu piunera nuannaarutissaasoq.

Siumumut pingaarpoq illuinnaasiunngitsumik innuttaasunullu tamanut sammisitamik tassalu meeqqanut, inuusuttunut inersimasunut angajoqqaanut, utoqqarnullu sammisumik inuiaqatigiinnullu qaammarsaataasunik sammitinneqartunik immersorneqaatigisartagarput. Inuiaat kalaallit aallakaatitanik assigiinngissitaartunik periarfissaqartitaanissaat nutaarsiassanik, qaamarsaatiniutinik aliikkutassanik aammalu innuttaasut sullinneqarneranut paasissutaasussanik aallakaatitsisarnissaminut periarfissaqartitaasusaaq.

Tamannalu KNR-imut aningaasaliissuteqarnermi oqaasertaliussani ersarimmat malinneqarnissaalu tunngavissaqarluartuummat issuaaffigilaarniarpaara imatut allaqqusoqarnera pitsaaqimmat. Tassalu: "Aallakaatitassanik pilersaarusionermi aallakaatitassanillu pissaqartitsinermi tamatigoortuuneq assigiinngissitaartunillu aallakaatitassiorsinnaaneq anguniarneqassasut. Paasissutissiisarnermi pitsaassuseq sammisap qimannaveersaarnissaa pivusorsiorneq illuinnaasiunnginnissarlu pingaartinneqassapput."

Siunnersuuteqartup sunik itinerusunik aallakaatitsinissamik kissaatinik taaguinera tusaatissatut tiguarput. Isumaqarpugullu tusagassortut eqqummarillutik aammalu avatangiisitsinni pisunut malinnaanertik aallaavigalugu tusagassanik immersuisarnerat ilaatigut uparuartuuteqarfigissallugu pisariaqartaraluartoq, tusagassortut tusagassiornerminni kiffaanngissuseqarnerat Siumumit ataqqinnilluta ingerlanneqartuarnissaa pisariaqartutut isumaqarfigaarput, ingammillu illuinnaasiunngitsumik pinninnissaaq

kissaatigisartakkatta immaqqa oqaatigineqarsinnaasut annersarisarpaat, tamannalumi pingaaruteqartorujussuartut isumaqarfigaarput.

Inuiaqatigiit ingerlanneqarnerannut aviisiliortut tusagassiisartullu saqqummiisarnerminni periusersaat inuiaqatigiinnut naammaginartumik tamatsinnullu soqutiginartumik ingerlaaseqaruni inuiaqatigiit akaareqatigiinnerannut sunniuteqarsinnaanera Siumumit uppeaarput. Taamaattumik KNR-p aqunneqarnera tassanilu atorfeqartitaasartut kalaallit inuiaqatigiit qanoq inooriaasiannut kulturiannullu ilisimasaqarluarnissaat assut Siumumit pingaaruteqartorujussuartut isumaqarfigisaratsigu isertuutissanngilarput.

Kalaallit nunaata radiuanut 2013-mi tapiissutit 63,822 mio. kr., 2014-mi 67,779 mio. kr. najukkamilu TV-kkut radiukkut aallakaatitsisarfiit peqatigiiffianut tapiissutit 2013-mi 1,835 mio. kr., 2014-mi 1,863 mio. kr.-iupput. 2014-mi 3 mio. kr.-nimut qaffaanermut tungaviuvoq KNR-ip illorsuata oqoqalersimanera pillugu ininik attartortoqarnera.

Qulaani aningaasaliissutaasut tikkuareerlugit Siumut isumaqarpoq aningaasaliissutaasut KNR-p nammineq sumut qanorlu atorneqarnissaat pilersaaruteqarfigunigit pitsaanerpaassasoq. Ukioq mannaluk Naalakkersuisut KNR-p nutaamik siulersorneqarnissaanik nalilersuinerata ingerlatinneqaleruttorfiani siunnersuut manna qaqqinneqartoq ilalinninnatsigu oqaatigissavarput.